

Оила қурмоқчи бўлганларга имтиҳон саволлари



17:00 / 20.10.2021 8621

Бу мақола эркак киши уйланмоқчи бўлган аёлга бериши керак бўлган 12 та савол ва аёл киши турмушга чиқмоқчи бўлган йигитга бериши лозим бўлган 10 та саволдан иборат. Бу 22 та саволда бўлажак турмуш ўртоқларнинг (эркак-аёл) олдиндан билиши зарур бўлган ҳақлари ва мажбуриятлари ёритилган ҳамда эр-хотин томонидан уларнинг бажарилиши ёшларнинг бахтли келажагини таъминлайди, иншааллоҳ.

Эркак киши аёлга бериши керак бўлган саволлар:

1. Оила бойлик ёки гўзаллик учун қурилмайди, балки никоҳ ўз нафсини жиловлаш ва насл-насабни давом эттириш учундир. Бу ҳақда нима деб ўйлайсиз?

2. Аллоҳ таоло Нисо сурасининг 34-оятида оиладаги масъулиятни эркак кишининг зиммасига юклаган. Сиз бунга розимисиз?
3. Ислом талабларига кўра, аёл кишига жуфти ҳалолдан ўзгаси қараши ножоиз. Шунинг учун у (аёл) бегоналарнинг, яъни номаҳрамларнинг олдида авратини ёпиб юриши керак. Бу масала бўйича сизнинг фикрингиз қандай?
4. Аёл киши жуфти ҳалолини у (эри) хоҳлагандай номлаши ва чақириши керак. Шу билан бирга аёл эрини табассум билан кутиб олиши ва ўз хулқи билан унга ҳурмат кўрсатмоғи керак. Шу фикрга қўшиласизми?
5. Бу ҳаётда Аллоҳ бизни синайди. Сиз қандайдир муддат ишсизликка ва камбағалликка сабр-қаноат қила оласизми? Шунингдек, ўзингизни бошқа бадавлат аёлларга нисбатан ҳасаддан сақлай оласизми?
6. Асосан аёл киши уй ишларини бажариб, вақтини уйда ўтказиши керак. Агарда уйдан чиқиши керак бўлиб қолса, у эридан изн сўраши зарур. Бунга фикрингиз қандай?
7. Аёл киши эрининг муаммоларини тушуниши ва уни ёлғиз қолдирмаслиги лозим. Эркак киши ҳам аёлининг муаммоларига нисбатан шуни тақдим қилиши керак. Бу ҳақда нима дейсиз?
8. Эр-хотин бир-бирининг сирларини сақлай билиши ҳамда уларни ота-онаси ва бошқаларга очиб юриши тўғри эмас. Оилавий сирларни қаттиқ тутмоқ керак. Сиз бунга қўшиласизми?
9. Аёл киши эрининг ота-онаси ва қариндошларига худди ўз ота-онаси ва яқинларига кўрсатган ҳурматни, меҳрни кўрсата олиши керак. Бунга сизнинг фикрингиз қандай?
10. Эр-хотин бир-бирига мадад бўлиб, оилавий ришталарини муҳофаза қилиши керак, ҳаттоки айрим қариндошлар ҳасад ёки нонкўрлик сабабли уларнинг турмушини бузмоқчи бўлсалар ҳам, агарда бундай кимсалар ота-она ва жигарлар бўлишса ҳам. Сиз бунга қўшиласизми?
11. Мен ҳар бир эркак каби аёлнинг гўзаллиги ва жозибаторлигига ишонаман. Лекин, шундай бўлса-да, ташқи гўзаллик энг муҳими эмас, деб ўйлайман. Менинг бу фикримга қўшиласизми?
12. Аёл киши ҳам шариат, ҳам урф-одатларга биноан эрига қулоқ солиб, унга итоатда бўлиши керак. Агар хотин жуфти ҳалолига бўйсунмаса, ўз

бурчини бажармаган ҳисобланади ва шунинг учун эркак киши уни моддий томондан таъминламаслиги мумкин. Бу масалада фикрингиз қандай?

Аёлнинг эркак кишига бериши керак бўлган саволлари:

- Эркак киши аёлини унга зарур бўлган бошпана ва кундалик егуликлари билан таъминлаши керак. Агар аёл киши касал бўлиб қолса, эри унинг даволаниши билан шуғулланиши лозим. Шундайми?

- Аёл кишига боқиманда, ортиқча ташвиш сифатида қараш мумкин эмас. Чунки у оиланинг асосий таянчидир. Ислонда аёл эркакка Аллоҳ томонидан берилган омонат ҳисобланади. Шунинг учун эркак киши аёлига нисбатан ҳурматли ва мурувватли бўлиши керак. Бундан ташқари, Ислон дини эр-хотинни “бир-бирига ёпинчиқ (либос)” дея таърифлайди. Бу борада сизнинг фикрингиз қандай?

- Эркак киши аёлини ноҳақ уришга ҳаққи йўқ. Агар бу ҳолат содир бўлган бўлса, эркак киши аёлига шариат қонунлари томонидан белгиланган товонни тўлаши керак. Агар аёл киши итоатсизлик қилса, аввало, у огоҳлантирилиши зарур. Сиз бунга қўшиласизми?

- Эркак киши хотини каби шахсий гигиена қоидаларига риоя қилиши ва ўзини покиза тутиши керак. Бунга нима дейсиз?

- Эркак киши аёлига шариат қонунларидан чиқмаган тўй ёки жаноза маросимларига боришликка тўсқинлик қилмаслиги керак. Агар доимо бунга тўсқинликлар қилса, аёл киши уй юмушларини қилишдан бош тортиши мумкин. Бу ҳақда нима деб ўйлайсиз?

- Эркакнинг аёлига нисбатан меҳри сўнмаслиги учун у кўчадан келганда аёли билан кўтаринки кайфиятда кўришиб, уйдан кетишидан олдин хайрлашиши лозим. Нима дейсиз?

- Эркак киши, Пайғамбаримиз соллаллоҳу алайҳи васаллам суннатларига мувофиқ, аёлига уй юмушларида ёрдамлашиб туриши керак. Сиз бунга қўшиласизми?

- Агар аёл киши бир хато қилиб қўйса, эркак унга бақирмаслиги ва қаттиқ уришмаслиги лозим. Бу ҳақда нима деб ўйлайсиз?

- Оилали аёл ишлаб пул топишига нима дейсиз?

- Эркак киши ўз аёлига шубҳа ва гумон билан қарамаслиги керак. Бу борада у тухматчи-ю фитна тарқатмоқчи бўлган инсонларнинг (ҳатто бу ота-онаси бўлса ҳам) ҳар бир сўзларига ишонмаслиги лозим. Сиз бунга қандай фикр билдирасиз?

Манба: hidoyat.uz

Муслимахон Анвархонова таржимаси